

## **Ebbaluᅇa ya Yuda Enyanjula**

Ebbaluᅇa ya *Yuda* owayiᅇandiiha baali bamulanga baati Yuda. Yuda geromaho ati gaali muganda wa Yakobbo muganda ya Yesu. Sihimanyiheene oba ebbaluᅇa yino yaali ya hibubbu hy’abafugiirira Kurisito. Aye hitegereheha hiiti mu bagayiᅇandihira mwalimo Abayudaaya, olwohuba aloma hu biri mu Ndagaano Ekayire. Ne gayiᅇandiihira “enywe mwesimwesi abahoda ba Hatonda Seefe era aba galanga era aba ahuuma olw’ohufugiirira Yesu Kurisito” (1). Era hiboneha oti gayiᅇandiiha mu mwaha ogw’enkaaga oluvanyuma lw’ohusaaliwa hwa Kurisito.

Ehigendererwa hy’ohuᅇandiiha ebbaluᅇa yino, gendire ohulabula abafugiirira Kurisito hu biᅇamba hu basomesa ab’obudulingi (Yuda 4). Aloma hu byaliᅇo mu Ndagaano Ekayire ng’ehyohuboneraho. Ebbaluᅇa yino, efaananaho n’ebbaluᅇa ya Peetero eyohubiri (Peet 2:1).

### **Ebiri mu bbaluᅇa yino mu buupi**

1. Yuda geyanjula (1-2)
2. Ohwehuuma abasomesa ab’obudulingi (3-4)
3. Ehy’ohuboneraho ohuᅇwa mu Ndagaano Ekayire (5-16)
4. Ehyohuhola hu biᅇamba hu hulabula (17-23)

## 5. Agohoba n'ajumirya Hatonda (24-25)

<sup>1</sup> Ndiise Yuda omuñeeresa wa Yesu Kurisito era mulebe ya Yakobbo. Pandiihira enywe abahoda ba Hatonda Seefe era aba galanga era aba ahuuma olw'ohufugiirira Yesu Kurisito.

<sup>2</sup> Ehisasabirisi n'emiyaaya n'ohwenda ohuñwa eyiri Hatonda, byeyongere ohuba ni nenywe.

### *Abasomesa ab'obudulingi*

<sup>3</sup> Abaatu ba Hatonda abahoda, wayire naali nendire ohubañandiihira hu hunoñoha ohu hwasuna, mula pulira ti hirañi mbañandiihire ni mbagobosamo amaani mweyongere ohuñirirania esomesa ey'obudulingi olw'ohufugiirira ohu Hatonda gañambya abaatu babe omulundi mulala gwoñene nga biñwa.

<sup>4</sup> Hiri hiityo olwohuba eriyo abaatu abatatya Hatonda abaamomoka babengiramo mu hyama n'esomesa ebbaamya. Abaatu abo basomesa baati mbo ehisasabirisi hya Hatonda hibaña ehiyale ohweholera obuhwedi era sibafugiirira baati Yesu Kurisito nje Musengwa era añuga. Ebyañandihiwa bibalomaho biiti abo baahena hale ohubasalira omusango.

<sup>5</sup> Wayire ebiitu bino mubimanyire, nenda ohubahebulisa ti Musengwa\* gatusa Abayisir-ayiri e Misiri ne oluvanyuma gasihiirisa abo abatafugiirira bibye.\* <sup>6</sup> N'abamalayika abajeema, Hatonda gabadanya mu komera eyo mu hiirema ni babasidihire n'enjegere eyi bali

\* **1:5** 1:5 Ebyañandihiwa ebindi biroma biiti Yesu Musengwa.

\* **1:5** 1:5 Huñ 12:51; Hub 14:29-30

ohwola hu ludaalo olw'ekomerero olu alisali-raho omusango. <sup>7</sup> Mu ngeri nj'enyene, abaatu b'e Sodoma n'e Gomora ko n'ebibuga ebindi eby'ohumulirano, baahola obuhwedi owa hi-isi ngeri. Hatonda gabasihiirisa era ehyo hirino ng'ehyohuboneraho ti abo abajeemu balibadanya mu muliro eyi baligada emirembe n'emirembe.\*

<sup>8</sup> Abaatu abo abatatya Hatonda, mu ngeri nj'enyene eyo boosi bahola obuhwedi olwohuba mbo baasuna ohwolesewa Hatonda gaabafugirira ohuhola ebiitu hy'ebyo. Abaatu abo bajeemera Hatonda era baloma ebibono ebibi hu bitonde ebyomwigulu. <sup>9</sup> Cooka ni Mikayiri omuhulu w'abamalayika ni gaali n'ahaabira ni Sitaani omulambo gwa Musa, malayika oyo sigamusalira musango aye gamuloma ti, "Hatonda ahugudye!"\* <sup>10</sup> Aye abaatu abo, bafodogola ebyo ebi batamanyire era bali hy'esolo ejinjuma hutegeera. Bahola ebiitu ebi baletera ohusihiriha olwohuba hiisi ehi epeega yaawe yibaloma ohuhola nj'ehi bahola. <sup>11</sup> Jibageene, olwohuba banjambire esambo ja Kayini oweeta Abbiri mulebewe. Baluluhanira ebbeesa hya Bbalamu era hya Koola owasihiriha olw'obujeemu wuwe, mu ngeri nj'enyene boosi balibasihirisa.\*

<sup>12</sup> Abaatu abo bali hy'ehiitu ehy'embihohu hiinjulo hyenywe ehy'ohuhebuliriraho Yesu Musengwa, banjuma hwenjomeha mu bulamu waawe. Era banjuma n'esoni, bali hy'abaayi

---

\* **1:7** 1:7 Tand 19:1-24 \* **1:9** 1:9 Mag 34:6; Dan 10:13,21; 12:1; Zak 3:2; Hub 21:7 \* **1:11** 1:11 Tand 4:3-8; Hub 22:1-35; 16:1-35

abafa hu bida byabwe mu hifo hy'ebisolo ebibaaya. Bali hy'ebireri ebidumbadumbana aye sibitonyesa fula. Bali hy'emisaala ejitaama bibala mu biseera byajo era jooma ohunwera erala n̄aasi hu biholo. <sup>13</sup> Abaatu abo bali hy'ebimoto by'amaaji hu nyanja era hy'amaaji amadumbuhi n'esambo jaawe jinjambya esoni. Bali hy'emunyeenye eji otanjanga hwesiga ohuhulagirira eyi oja. Baja hubanjindiha mu hiirema babe eyo emirembe n'emirembe.

<sup>14</sup> Enoka owaaliŋo mu mulembe ogwomusanvu ohunwa hw'Adamu, galoma hu baatu abo ati, "Musengwa aliija n'abamalayika babe eduuli,\* <sup>15</sup> ohusalira abaatu bosibosi abatatya Hatonda omusango olw'ebibi ebi bahola mu ngeri ey'ohutatya Hatonda n'olwebibono byosibyosi ebi bamulomaho." <sup>16</sup> Abaatu abo, basiiba bemulugunya era ni bendula ebibi hu baatu. Benjira baati mbo nj'abahihenaho era bahiina abaatu abandi olw'ohwenda ohubasunaho ehi baba ni benda.

### *Ohulabula n'ohulaabbira*

<sup>17</sup> Aye balebe bange abahoda, muhebulire ebi bahwenda ba Musengwa weefe Yesu Kurisito baaloma. <sup>18</sup> Babalomera baati, "Mu ndaalo ej'ekomero, n̄alibaan̄o abaatu abalibanyooma era abaligondera ohwegomba hwawe ohubi ohw'omubiri." <sup>19</sup> Era abaatu abo, nj'abali huleetanga ohwesalamo mu nywe olw'ohwegomba hwabwe ohubi era banjuma Omwoyo Omutukuvu mu bulamu waawe. <sup>20</sup> Aye enywe

---

\* **1:14** 1:14 Tand 5:18,21-24

balebe bange abahoda, mweyongere ohuhula mu hufugiirira hwenywe era mulombenga Hatonda mu maani g'Omwoyo Omutukuvu.

<sup>21</sup> Mugumire hu hugendera mu hwenda hwa Hatonda ni mulindirira Musengwa weefe Yesu Kurisito ohubaŋa obulamu obutaŋwaŋo.

<sup>22</sup> Muŋambirenga ehisa abafugiirira Yesu ababa ni bali n'ohubuusabuusa mu bulamu waawe. <sup>23</sup> Abandi mubaŋalulenga ohuŋwa mu muliro; n'abandi mubaŋambirenga ehisa era ehyo muhiholenga n'ohwegenderesa cooka mucaawenga esambo jaawe embi.

### *Ohuseebula*

<sup>24</sup> Ale ŋaahani muŋenga eŋono Hatonda weefe oyo asobola ohubahuuma ndimugwa era gabengisa mu ŋono lirye ni muŋumaho mbalo era ni muli n'esangaalo. <sup>25</sup> Era abaatu ni babita mu Yesu Kurisito Musengwa weefe baŋenga Hatonda era Omunoŋosi weefe eŋono olwohuba nj'omulala yeŋene. Ye nj'omwene buŋangi, nj'anuga, nj'owaaliŋo ohuŋwa ahale nahale, aliŋo hatyane era nj'aja hubaŋo emirembe n'emirembe. Amiina.

**Endagaano Epyaha mu Lunyole**  
**Nyole: Endagaano Epyaha mu Lunyole (Bible)**

copyright © 2019 Wycliffe Bible Translators, Inc.

Language: (Nyole)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

e00787cd-838f-597a-9477-00b97e4e2cff